

# Liber access a datas administrativas

La regenza sustegna in'intervenziun parlamentara da la fracziun da la PPS

DA MARTIN CABALZAR/FMR


■ **Las datas rimnadas da l'administraziun chantunala duain daventar accessiblas per la publicitad e quai a moda automatisada. Quai pretenda la fracziun da la PPS en in'incumbensa parlamentara. La regenza è pronta d'acceptar l'incumbensa.**

Tenor il schef da fracziun *Jan Koch* duain datas administrativas avertas rinforzar la trasparenza, animar a la participaziun e promover l'innovaziun. Cun la plattafurma «*opendata.swiss*» haja la Confederaziun stgaffi in model che lubeschia gia oz da consultar datas captivantas, constatescha Koch. Il progress tecnologic permetessia da metter a disposiziun in access simpel e pussibilitassia uschia l'utilisaziun multipla da las datas senza pli gronds custs da manaschi. Koch è consignants èn era persuadids che l'administraziun publica senza profitassia e fasheschia in pass impurtant en direenziun dal princip «*Once-only*». Era pudessian tuts sa participar a la rectificaziun e raffinaziun da las datas e quai la finala per interess vicendaivel. «Il niz da las datas per l'economia publica vegniss schizunt multiplitgà», ha ditg Koch vers la FMR. Per tut quests motivs vul la PPS incumbensar la regenza d'elavurar ina strategia concernent «*open-government-data*» sco er d'establi e garantir a lunga vista las cundiziuns generalas.

## La regenza va d'accord

En sia resposta infurmescha la regenza ch'ella haja deliberà gia 2018 la strategia dad «*e-government*» che furma la basa per sviluppar vinavant la digitalisaziun en l'administraziun chantunala. La finmira da questa strategia saja da pudair tgirar in contact cumadaivel ed independent dal lieu cun l'administraziun chantunala e da metter a disposiziun servetschs sin via electronica ed automatisada. Cun agid da la nova tecnologia vul la regenza er render ils process administrativs pli effizients ed optimar la qualidad dals servetschs.

La digitalisaziun previda duai accelerar ils process administrativs ed evitar da registrar pliras giadas las datas electronicas ch'èn gia avant maun, evitond uschia process redundants. Quai permettia da simplifitgar las fatschentas administrativas cun la populaziun sco er cun las interpresas, d'evitar interraziuns nunnecessarias e da meglierar la qualidad da las datas. La regenza sa stentia bain er d'amplifitgar permanentamain las prestaziuns digitalas dal chantun a favur da la clientela. Ma ella accentuescha dentant era che quai possia capitar mo entaifer las limitas da las disposiziuns vertentas da la protecziun da datas e ch'ins stoppia per part anc crear novas basas giuridicas persuerter. Las administraziuns chantunalas registreschan, rimnan ed elavuran gia



Cun «*opendata.swiss* han Confederaziun e chantuns stgaffi ina plattafurma OGD.

MAD

oz numerusas datas da tut gener sco datas da statistica, geoinformaziun, ambient, aura, mobilitad, energia, bains culturals e da differents publicaziuns uffizialas. I sa tractia qua cunzunt da datas che na sa refereschan betg a persunas, che possian esser accessiblas gratuitamain ed a medemas cundiziuns per tut ils interes-

sents. Questas datas possian era vegnir elavuradas vinavant ed utilisadas da terzas persunas. Tenor la strategia da la Confederaziun e dils chantuns promovia il liber access a datas administrativas «la trasparenza e la participaziun, rinforzia la responsabladad e gidia ad augmentar la creaziun da valor», scriva la Regenza.